

Allannguutissatut siunnersuut

Uunga

Siunnersuut uunga: Qimmit qimuttut kiisalu qimmeqarneq qitsuuteqarnerlu pillugit inatsisartut inatsisaata allanngortinneqarneranik Inatsisartut inatsisaat nr. xx, uu. qqqq 2011-meersoq

(Qimmit paatinneqartartut nukittuullu eqquteqqusaajunnaarnerat)

Aappassaaneerlugu suliarineqarneranut Naalakkersuisunit saqqummiunneqartoq

§ 1

Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaanni nr. 18, 30. oktober 1998-imeersumi, kingullermik Inatsisartut inatsisaatigut nr. 28, 18. november 2010-meersukkut allanngortinneqartumi, makkua allanngortinneqarput:

1. § 10, imm. 2-4, ima oqaasertaqasaq:

”Imm. 2. Qimmit upanninnikkut inunnik uumasunilluunniit allanik kiiserujussuarsimasut politiit akulerunnerisigut ingerlaannaq toqunneqartassapput piginnittumit akilerneqartussamik.

Imm. 3. Qimminik paatitsisarneq inerteqqutaavoq.

Imm. 4. Qimminut tunngasunik suliaqarsinnaatitaaneq pineqaatissiinikkut killeqanngitsumik imaluunniit piffissamik killilikkamik arsaarinnissutigineqarsinnaavoq, pineqartoq

1) qimmiminik inunnik uumasunilluunniit saassussititsisimappat qunusaaruteqarsimappalluunniit,

2) qimmini inunnik uumasunilluunniit saassussisoq paasereeraluarlugu unitsinniarlugu iliuseqarsimanngippat, imaluunniit

3) qimminik paatitsisarsimappat.”

2. § 12, imm. 1 kingorna ilanngunneqassaaq:

”Imm. 2. Qimminik makkuninnga piginninneq, eqqussineq piaqqiortitsinerlu inerteqqutaavoq:

1) Pitbull terrier.

2) Tosa inu.

3) Amerikarmiut staffordshire terrieriat.

4) Fila brasileiro.

5) Dogo argentino.

6) Amerikarmiut bulldogiat.

7) Boerboel.

8) Kangal.

9) Aasiap qiterpasissuanit ovtcharka.

10) Kaukasiamit ovtcharka.

11) Ruslandip kujataanit ovtcharka.

12) Tornjak.

13) Sarplaninac.

Imm. 3. Imm. 2-mi inerteqqut aamma atuuppoq qimminut qimminit qulaani taaneqartunit akuneqarsimasunut.”

3. § 12 kingorna ilannguneqassaaq:

”§ 12 a. Qimmit § 12, imm. 2 unioqqutillugu pigineqartut, eqqunneqarsimasut piaqqiortinneqarsimasulluunniit qimmimik piginnittumut taarsiissuteqarfiumngitsumik politiit akulerunnerisigut toqunneqartassapput piginnittumit akilerneqartussamik.

Imm. 2. Qimmeq qimminut § 12, imm. 2-mut ilaatinneqartunut ilaanersoq taakkuninngaluunniit akusaanersoq nalornissutigineqarpat piginnittup qimmip qimmeqatigiinnit sorlerneersuuneranik suuneranilluunniit uppernarsaanissaa politiit piumasarisinnaavaat.

Imm. 3. Piginnittoq imm. 2 naapertorlugu erngerluni naammattumik uppernarsaammik takussutissiisinnaangippat, qimmip piginnittumit arsaarinnissutigigallarnissaa siunertaralugu politiit iliuuseqarsinnaapput.

Imm. 4. Arsaarinnissuteqarallarnermut atatillugu aningaasartuutaajunnartut piginnittumit akilerneqassapput.

Imm. 5. Uppernarsaanissamik politiit piumasaqarneranni tigungminnittoq piginnittorlu assigiinngippata qimmip qimminut § 12, imm. 2-mut ilaatinneqartunut ilaannginneranik taakkuninngaluunniit akusaannginneranik piginnittup naammattumik uppernarsaasiinissaanut pisut apeqqutaatillugit naapertuuttumik politiit piffissaaliissapput.

Imm. 6. Piginnittoq politiit piffissaliussaata iluani qimmip qimminut § 12, imm. 2-mut ilaatinneqartunut ilaannginneranik taakkuninngaluunniit akusaannginneranik naammattumik uppernarsaasiisinnaasimangippat qimmeq § 12, imm. 2-mi inerteqqummut ilaasutut isigineqassaaq.

§ 12 b. Inuit 1. juli 2011 qimminik § 12, imm. 2-mi taaneqartunik taakkuninngaluunniit akusanik pigisaqartut qimmiutertik tigungmiinnarsinnaavaat.

Piumasaqaatit makkua malinneqassapput:

- 1) Qimmit pineqartut allanut tunniunneqaqqusaanngillat.
- 2) Qimmit sumiiffinni kikkut tamarmik ornissinnaasaanniikkaangamik pituutaqartinneqassapput takinerpaamik 2 meteriusussamik aatsarnaveeqquteqartinneqassallutillu.”

4. § 28, imm. 1, ima oqaasertaqassaaq:

”§ 7, imm. 1-imi, § 8, imm. 1-imi, § 9, imm. 1 aamma 2-mi, § 10, imm. 1-3-mi, § 12, imm. 2 aamma 3-mi, § 12 b-mi, §§ 14-18-imi, § 19, imm. 1, 2, 4 aamma 5-mi, § 20-mi kiisalu § 21, imm. 2-mi aalajangersakkanik unioqqutitsinerit akiliisitaanermik kinguneqarsinnaapput.”

5. § 28, imm. 3, ima oqaasertaqassaaq:

”*Imm. 3.* § 10, imm. 1 aamma 3-mi, § 12, imm. 2 aamma 3-mi, § 12 b-mi kiisalu §§14-18-imi aalajangersakkat annertuumik arlaleriarluniluunniit unioqqutinneqarsimappata, uumasuuteqarsinnaaneq uumasuutinilluunniit sammisaqarsinnaaneq suugaluartorluunniit inertequtigigitinneqarsinnaapput.”

6. § 28, imm. 5 kingorna ilanngunneqassaaq:

”*Imm. 6.* Inatsit manna malillugu akiliisitsissutit nunatta karsianut nakkartinneqartassapput.”

§ 2

Imm. 1. Inatsisartut inatsisaat 1. juli 2011 atuutilerpoq, taamaattorli imm. 2. takuuk.
Imm. 2. § 12, imm. 2-mi taamaallaat pineqarput qimmit Inatsisartut inatsisaata atuutilernerata kingorna piaqqiarineqartut.

Namminersorlutik Oqartussat, ulloq uu. qqqq 2011

Kuupik Kleist

/

Ove Karl Berthelsen

Allannguutissatut siunnersuummut nassuiaatit

Nalinginnaasumik nassuiaatit

Inatsisissamik siunnersuutip kalaallisut oqaasertaani nutserinerlunneq pissutigalugu inatsisartunut inatsisissamik siunnersuummut allannguutissatut siunnersuummik saqqummiussisoqarpoq. Nutserinerlunneq pissutigalugu kalaallisut inatsisissamik siunnersuutip oqaasertaani naqqiisoqarpoq. Inatsisissamik siunnersuut allannguutissatut siunnersuutitut saqqummiunneqassaaq. Inatsisissatut siunnersuutip qallunaatuani allannguisoqanngilaq

1. Aallaqqaasiut

Ukiuni kingulliunerusuni qimmiuteqartarneq nunarsuaq tamakkerlugu nalinginnaalieriartuinnarpoq, taakkualu qimmit paatinneqartartunik nukittuunillu taaguuteqartineqarajupput. Qimmit taakkua uumasuutitut pigineqartarnerisa nalinginnaalieriartuinnarnerata malitsigisaanik, qimmit taakkua inini tamanit atorneqartartuniinnerminni pissusilersortarnerat sammineqalerpoq. Nunani allani qimmit paatinneqartartut aamma nukittuut uumasunik inunnillu annertuumik ajoqusiisarnerat takussaaleriartorsimavoq. Qimmit taakkua akuttungitsumik qiningasaarniartarnerat ajornerpaamillu pisoqartillugu navianartorsiortinneqarlutik misiginerminni uumasunut allanut imaluunniit inunnut saassussisartut pillugit oqallittoqartarsimavoq.

Qimmit taakkua qimmitut paatinneqartartut nukittuutullu taaneqartartut amerlanertigut uumasunik angisuunik nujuartanik aallaaniarnermut imaluunniit ineqarfinnik paarsinermut atorneqartussatut kinguaassioortinneqartuneersuusarput, assersuutigalugu Dogo argentino puulukit nujartat nassaarinissaannut aammalu aallaaniartup anngunnissaata tungaanut kiillugit uninnगतinnissaannut kinguaassioortinneqartartut. Qimmit qiningasuusussatut namminersorsinnaasussatullu kinguaassioortinneqartarput, aammalu qimminut ilisarimangisaminnut qiningasaarlutik qisuariartarput. Piginnittut qimmiminnik perorsaaniissamut passussinissamullu pitsaasuullutillu pikkorissuseqaraluarpataluunniit, qimmit inunnut uumasunullu saassussisinnaanerat, qimminut allanut naleqqiullugit aarlerinaateqarnerusarpoq.

Kalaallit Nunaanni aamma qimmeqarpoq qimmitut paatinneqartartut nukittuutullu taaneqartartunik. Ilimagineqarpoq maannakkorpiaq qimmit paatinneqartartut nukittuullu imaluunniit Kalaallit Nunaanni taakkunanga akusaasut 30-it missaanniittut, taakkualu amerlanersaat Nuummiipput. Qimminik taakkuninnga eqqussinissamik, kinguaassioortitsinissamik pigisaqarnissamillu inerteqquteqalernissamut siunertaapput, Kalaallit Nunaata nunani allani inerteqquteqarnermut naleqqiullugu qimarravigineqartarnissaata pinngitsoortinnissaa, uumasunik inunnillu ajoqusiisinaanernik pitsaaliuinissaq kiisalu innuttaasut, pingaartumik meeqqat qimminut taakkununnga ulorianarsinnaasunut illersorneqarnissaat. Tamatuma saniatigut siunertaavoq inuit imaluunniit uumasut qimminut saassunneqarlutik pisoqalernissaanik pitsaaliuinissaq.

Inatsisartut inatsisaat qimminik paatinneqartartunik nukittuunillu inerteqquteqarlunnarnissamik imaqassaaq. Aammattaq kommunimi qimmiuteqarnermut qitsuuteqarnermullu ileqqoreqqusanut qimmiuteqarnissaq pillugu maleruagassaqarpoq, tassanilu kommunit maleruagassanik annertunerusunik aalajangersaasinnaapput.

2. Siunnersuutip imarisai pingaarnerit

Qimmit assigiinngitsunik 13-inik suussuseqartut inerteqqutigineqartut tassaapput: Pitbull terrier, Tosa inu, Amerikarmiut staffordshire terrieriat, Fila brasileiro, Dogo argentino, Amerikarmiut bulldogiat, Boerboel, Kangal, Aasiap qiterpasissuanit ovtcharka, Kaukasiamit ovtcharka, Ruslandip kujataanit ovtcharka, Tornjak aamma Sarplaninac. Qimminik assigiinngitsunik 13-inik suussuseqartunik taakkuninnga eqquassinissaq, kinguaassioortitsinissaq pigisaqarnissarlu inerteqqutigineqarpoq. Inerteqquteqarneq aamma qimminit inerteqqutaasunik suussuseqartunit ataatsimit arlalinnilluunniit akusaasunik eqquassinissamut, kinguaassioortitsinissamut pigisaqarnissamullu atuuppoq. Inerteqquteqarnermi pigisaqarnissap ilaatinneqarneranut atatillugu, siunnersuummi qimminik inerteqquteqarnermi pineqartunut ilaasunik piginnittut, inerteqquteqarneq atuutilerpat qanoq iliussanersut pillugu aalajangersagaqarpoq.

Aammattaaq tamanna nalornissutigineqarsimappat qimmit suunerannut imaluunniit suussusaannut uppersartaat politiit piumasarisinnaagaat aammalu uppersartaammik naammattumik takutitsisoqanngippat qimmip tiguineqarsinnaanera pillugu aalajangersakkamik siunnersuut imaqarpoq. Piginnittup uppersartaatissaavaa qimmeq inerteqquteqarnermi pineqartunut ilaanngitsoq. Kingusinnerpaamik 1. juli 2011 qimmimik inerteqquteqarnermi pineqartunut ilaasumik pigisaqalersimagaanni, taanna pigiinnarneqarsinnaavoq, kisiannili allamut tunniuteqqusaanani imaluunniit kinguaassioortinneqaqqusaanani.

3. Siunnersuutip aningaasaqarnikkut allaffissornikkullu pisortanut sunniuteqarnissaa

Siunnersuut politiit suliassaqarnerulernerannik kinguneqarsinnaavoq, pissutigalugu politiit Inatsisartut inatsisaata malinneqarnissaa isumagisussaammassuk. Taamaattorli qimmit siunnersuummi pineqartunut ilaasut ikittuinnaanerat pissutigalugu allannguut annikitsuinnaassasoq naatsorsuutigineqarpoq.

4. Siunnersuutip aningaasaqarnikkut allaffissornikkullu inuussutissarsiortunut sunniuteqarnissaa

Siunnersuut aningaasaqarnikkut imaluunniit allaffissornikkut inuussutissarsiortunut sunniuteqassanngilaq.

5. Siunnersuutip avatangiisitigut pinngortitamullu sunniuteqarnissaa

Siunnersuut avatangiisinut pinngortitamullu sunniuteqassanngilaq.

6. Siunnersuutip allaffissornikkut innuttaasunut sunniuteqarnissaa

Siunnersuut innuttaasunut qimmimik imaluunniit qimmit suussusaannit akusamik pigisaqartunut sunniuteqarsinnaavoq. Inerteqquteqarneq malinneqanngippat politiit qimmeq tigusinnaavaat aammalu piginnittumut akiligassanngorlugu inississinnaallugu. Unioqutitsinerup malitsigisaanik qimmeq toqutsinneqarpat, piginnittup aningaasartuutit toqutsitsinermut attuumassuteqartut akilissavai. Uumasut nakorsaanni toqutsitsinermut aningaasartuutit 300 koruuniupput, tamannalu akit nalinginnaasumik ineriartornerat ilutigalugu allannguuteqassasoq naatsorsuutigineqartariaqarpoq.

7. Siunnersuutip Naalagaaffeqatigiinnermut aamma Namminersorlutik Oqartussanut attaveqatigiinnermut sunniuteqarnissaa

Siunnersuut Namminersorlutik Oqartussat inatsisaasa aamma Naalagaaffeqatigiinnerup akornanni assigiissaartoqalernissaanut iluaqutaassaaq.

8. Pisortani oqartussanut, kattuffinnut il.il. tusarniaaneq

Siunnersuut makkunani tusarniaassutigineqarpoq:

Naalakkersuisut Siulittaasuata Naalakkersuisoqarfia, Ineqarnermut, Attaveqarnermut Angallanermullu Naalakkersuisoqarfik, Aningaasaqarnermut Naalakkersuisoqarfik, Peqqisutsimut Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik, Isumaginninnermut Naalakkersuisoqarfik, Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfik, Nunamut Namminermut, Pinngortitamut Avatangiisinullu Naalakkersuisoqarfik, Aatsitassanut Ikummatissanullu Pisortaqaarfik, Kalaallit Nunaanni Rigsombudsmandi, Kalaallit Nunaanni Politimesteri, KANUKOKA, kommunit, KNAPK, KNQK, Kalaallit Nunaanni Uumasut Ikinngutaat, Nerisassanut aqutsisoqarfik, Nunatta Eqqartuussivia, Kalaallit Nunaanni Sulisitsisut Peqatigiiffiat aamma S.I.K.

Makkua tusarniaanermut akissuteqarput:

Naalakkersuisut Siulittaasuata Naalakkersuisoqarfia:

Siunnersuummut oqaaseqaatissaqanngilaq

Ineqarnermut, Attaveqarnermut Angallanermullu Naalakkersuisoqarfik:

”Siunnersuummi nutaamik § 12 b-imik ilanngussisoqassasoq siunnersuutigineqarpoq. Aalajangersakkami nutaami tassani imm. 1 nr. 2 malillugu ”sumiiffinni kikkunnilluunniit orninneqarsinnaasuniitillutik” qimmit pituutaqartinneqassapput aammalu qanimikkut assiaquteqartinneqassallutik. Aalajangersakkamut nassuiaatini takuneqarsinnaavoq tamanna pissasoq qimmeq ”silami, aqqusinermi, pisuinnaat aqquataanni, uninngaartarfinni il.il. nalinginnaasumik aqutigineqartartuni”. Nassuiaatini oqaatsimik “sumiiffiit kikkunnilluunniit orninneqarsinnaasut” paasinnineq illoqarfimmi nunaqarfimmilu aqqusineqartuni, pisuinnarnut aqquateqartumi, uninngaartarfeqartuni il.il, nunaminertanut taamaallaat tunngatinneqarpassippoq. Paarlattuanik paasinanngilaq oqaatsimi asimi nunaannaq, tassalu sumiiffiit illoqarfiup nunaqarfiullu avataaniittut, taamatuttaaq ilaatinneqarnersoq.”

Inuussutissarsiornermut Suliffeqarnermullu Naalakkersuisoqarfiup inatsisissatut siunnersuummi § 12 b-mut nassuiaatit allanngortippai taamaalilluni ersarissumik allassimalerluni oqaatsimi ”sumiiffiit kikkunnilluunniit orninneqarsinnaasut” suut ilaatinneqarnermut.

Aningaasaqarnermut Naalakkersuisoqarfik:

Aningaasaqarnermut Naalakkersuisoqarfik tusarniaanermut najoqqutassat imarisaasa oqaaseqarfiginissaannut pissutissarsisimanngilaq, kisiannili inatsimmut allannguummut nassuiaatini kukkunernik nassaarsimalluni.

Inuussutissarsiornermut Suliffeqarnermullu Naalakkersuisoqarfiup allannguutit taakkua inatsisissatut siunnersuummut nassuiaatini ilannguppai.

Isumaginninnermut Naalakkersuisoqarfik:

Siunnersuummut oqaaseqaateqanngilaq.

Peqqisutsimut Naalakkersuisoqarfik:

Siunnersuummut oqaaseqaateqanngilaq.

Nunamut Namminermut, Pinngortitamut Avatangiisinullu Naalackersuisoqarfik:

”Nunamut Namminermut, Pinngortitamut Avatangiisinullu Naalackersuisoqarfiup oqaatigaa inatsimmi § 10, imm. 2-mut allannguutissatut siunnersuut, qimmit inunnik saassussisimasut imaluunniit uumasunik allanik qaqqusimasut piaartumik toqutsinneqartarnissaat pillugu aalajangersakkanik imaqartoq. Qimminut inunnik saassussisimasunut tunngatillugu aalajangersagaq aamma politiit qimmiisa sulinerannut atuunnersoq pillugu nassuiaatini allanneqarnissaa isumaliutigineqartariaqarpoq. Taamatuttaaq isumaliutigineqartariaqarpoq qimmeq pituttaq timmissamik imaluunniit avinngamik pisaqartoq toqutsinneqassanersoq inatsimmut nassuiaatini isummerfigineqassanersoq – imaluunniit aalajangersakkami uumasut miluumasut anginerusut siunnerfigineqartut erseqqisaasoqassanersoq.”

Inuussutissarsiornermut Suliffeqarnermullu Naalackersuisoqarfiup allannguutit taakkua nassuiaatini ilannguppai, tassani erseqqissarneqarluni qaqugukku qimmeq § 10, imm. 2 naapertorlugu toqutsinneqartassanersoq. Nassuiaatini nassuiarneqarpoq politiit qimmiata inummik saassussinerani pisoq taamaattoq qanoq aaqqiivigineqartassanersoq.

”Naalackersuisoqarfiup oqaatigaa inatsimmi § 3-ip allanngortinneqarnissaa isumaliutigineqarsinnaasoq, taamaalilluni kommunit kattussuussimanerat eqqarsaatigineqassalluni.”

Qimmit qimuttut kiisalu qimmeqarneq qitsuuteqarnerlu pillugit Inatisartut inatsisaata allanngortinneqarnera pillugu Inatsisartut inatsisaanni nr. 28-imi 18. november 2010-imeersumi kommunit kattussuussimanerat eqqarsaatigineqareerpoq.

”Oqaatigineqarpoq ”sumiiffiit kikkunnilluunniit orninneqarsinnaasut” qanoq paasineqarsinnaanerani, taamaallaat illoqarfiup nunaqarfiullu iluani angalaarnermut tunngatillugu isummertoqartoq. Naalackersuisoqarfiup nassuiaatini qimmit asimi nunaannarmi angalaarnerannut maleruagassat suunerannik isummertoqarnissaa ujartorpaa. Siunnersuutigineqarpoq nassuiaatini asimi nunaannaq ilanngunneqassasoq imaluunniit qimmit asimi nunaannarmi angalaartillugit minnerpaamik qarngini assiaqutinik matoqqasunik peqartinneqassasut.”

Inuussutissarsiornermut Suliffeqarnermullu Naalackersuisoqarfiup inatsisissatut siunnersuummi § 12 b-imut nassuiaatit allanngortippai, taamaalilluni erseqqissumik allassimalerluni oqaatsimi ”sumiiffiit kikkunnilluunniit orninneqarsinnaasut” suut ilaatinneqarnerisut.

Kultureqarnermut, Ilinniartitaanermut, Ilisimatusarnermut Ilageeqarnermullu

Naalackersuisoqarfik:

Siunnersuummut oqaaseqaateqanngilaq.

Aatsitassanut Ikummatissanullu Pisorta qarfik:
Siunnersuummut oqaaseqaateqanngilaq.

Kalaallit Nunaanni Sulisitsisut Peqatigiiffiat (GA):
Siunnersuummut oqaaseqaateqanngilaq.

KANUKOKA:

KANUKOKA-p allannguutissatut siunnersuut kommuninut sisamaasunut ingerlateqqissimavaa. KANUKOKA-mit nalunaarutigineqarpoq allannguutissatut siunnersuummut allanik oqaaseqaatissaqaratik.

Kommune qarfik Sermersooq:

”Siunnersuut Kommune qarfik Sermersuumut aningaasaqarnikkut imaluunniit allaffissornikkut sunniuteqassanngitsoq naliliisoqarpoq.

Nassiunneqartut tunngavigalugit kommune siunnersuummut oqaaseqaatissaqanngitsoq ilisimatitsissutigisinnaavarput.”

Qeqqata Kommunia:

”§ 10, imm. 2. Qimmit inunnik saassussimasut imaluunniit uumasunik allanik qaqqusimasut piaartumik toqutsinneqassapput.” Oqaaseqatigiit taakkua paasineqarsinnaapput soorlu aamma arnavissap arnavissap allap piaraanik qaqquina aamma pineqartunut ilaasoq. Tamanna kalaallit qimmiisa qimuttut akornanni pissusilersortarnerattut nalinginnaasutut kommunip tungaaniit isigineqarpoq. Immaqa aamma qimmini allatut suussuseqartuni arnavissat arnavissat allat piaraannik toqutserusuttarnerat takuneqartarpoq. Qimminut assigiinngitsunik suussuseqartunut tamaginnut tamanna atuunnersoq uumasut nakorsaannit ilisimaneqassajunnarsivoq. Nunami maani ilisimaneqarpoq arnavissat nujitsorujussuit kiiniangitsorujussuillu arnavissat allat piaraannik qaqqerusuttartut. Qimmit taakkua qimminut allanut inunnullu saassussiniartartuunngitsuulluarsinnaapput. Taamaalilluni nunaqavissut innuttaasut akornanni tamanna qimmit qiningasaartuunerannik takussutissaasutut isigineqanngilaq. Kommunip kissaatigaa inatsimmi allannguutaasoq oqaasertalerneqassasoq, pisartut matuma siuliani taaneqartut, tassalu arnavissap allat piaraannik qaqqusarnera, qimmimik toqutsitsinissamik piunasaqaateqalersitsisussaajunnaarlugu aammalu qiningasaartutut imaluunniit nalinginnaanngitsumik pissusilersornertut isigineqartussaajunnaarlugu. Allatigut Qeqqata Kommuniata allannguutissatut siunnersuut iluarisimaarpaa aammalu akuerineqarnissaa tapersersorlugu, taamaattorli oqaasertaani allannguinnissaq taaneqartoq ilaatillugu.”

Inuussutissarsiornermut Suliffeqarnermullu Naalackersuisoqarfiup allannguutit taakkua allannguutissatut siunnersuummut nassuiaatini ilannguppai, taamaalilluni erseqqissarneqarluni qimmeq § 10, imm. 2 malillugu qaqugukkut toqutsinneqartassanersoq.

KNQK:

KNQK kalaallit qimmiannut qimuttumut immikkut inatsiseqarnissaq kissaatigalugu oqaatigaa, pissutigalugu perorsaaneq atuuffiilu qimminit allanit allaanerummata. Tusarniaanermut matumunnga oqaaseqaateqanngillat, kisiannili qimminut qimuttunut immikkut inatsiseqarnissaanik kissaateqarlutik.

KNQK tusarniaanermut matumunnga oqaaseqaateqanngimmat Inuussutissarsiornermut Suliffeqarnermullu Naalackersuisoqarfik tusarniaarnermut akissuteqaataat tunngavigalugu allannguuteqartitsinngilaq.

Danmarkimi nerisassanut aqutsisoqarfik:

”Siunnersuummi inatsimmi § 10, imm. 2 – 4-mik allannguinnissaq pillugu § 1, nr. 1 malillugu, § 10, imm. 2 oqaasertalerneqarpoq: *”Qimmit upanninnikkut inunnik uumasunilluunniit allanik kiiserujussuarsimasut politiit akulerunnerisigut ingerlaannaq toqunneqartassapput piginnittumit akilerneqartussamik”*. Tunngaviusumik tamanna isumaqarpoq, qimmeq timmissamik imaluunniit qitsummik pisaqaruni, piaartumik toqunneqartussaasoq. Isumaliutigineqarsinnaavoq tamatumunnga taarsiullugu danskit inatsisaannik allannguinermt (qimmit il.il. pillugit inatsimmi allannguinnissamik inatsit nr. 717, 25. juni 2010-imeersoq) sanilliullugu oqaasertaliineq atorneqassasoq, § 6, imm. 5-imi oqaasertaliineq imaalluni: *”Qimmeq saassussinermini inummik imaluunniit qimmimik allamik ajoqusilluni kiisisimappat, politidirektørip qimmeq toqutsissavaa”*. Danmarkimi pingaartumik ”qimminik ulorianartunik” ajornartorsiuteqarnerit tassaanusimapput taakkua inunnt qimminullu allanut qiningasuunerat.”

”Inatsisissatut siunnersuummi § 12 a, imm. 6-mi oqaasertat titarneq kingulleq imaappoq: *”...qimmeq § 12, imm. 2-imi unioqquitsisusinnaasutut isigineqarpat”*. Oqaasertat tamatumunnga taarsiullugu imatut oqaaseqatigiiliorneqarnissaa isumaliutigineqarsinnaagaluarpoq: *”...qimmeq § 12, imm. 2-imi inerteqquteqarnermi pineqartunut ilaasutut isigineqarpat”*.”

Inuussutissarsiornermt Suliffeqarnermullu Naalackersuisoqarfiup allannguutit taakkua, naleqquttuusorineqarsimatillugit ilannguppai.

Aalajangersakkanut ataasiakkaanut nassuiaatit

§ 1-imut

Nr. 1-imut

Aalajangersakkami aalajangerneqarpoq qimmit inunnik imaluunniit uumasunik allanik saassusisimasut taamaalillutillu ajoqusiiusumik kiisisimasut, politiit iliuseqarneranni toqutsinneqassapput kiisalu qimminik taakkuninnga toqutsisitsineq uumasunik piginnittumut taarsiinertaqanngitsumik pissasoq. Tamanna isumaqarpoq qimmeq pituttaq pituttaanngitsorluunniit timmissamik imaluunniit kikkaasumik, assersuutigalugu teriaq, pisaqarpat toqutsinneqassanngilaq, pissutigalugu tamanna qimmip pissusilersuutaanni pissusissamisoortuni ilaasutut isigineqarmat. Qimmip arnavissap pissusissamisoortumik pissusilersortarneranut ilaavoq qimmip arnavissap allap piaraannik kiisarneq, aamma taakkua toqussutigisaannik. Qimmeq arnaviaq qimmip arnavissap allap piaraannik

toqussutaasumik kiisippat, aallaaviatigut politiit immaqqa uumasut nakorsaannik isumasioqateqarlutik aalajangissavaat, pissusissamisoorumik pissusilersorneq imaluunniit qimmeq qiningasaartoq pineqarnersoq taamaalillunilu toqutsinneqassanersoq. Politiit qimmii saassussinermi tuulli inunnik imaluunniit uumasunik allanik ajoqusiisumik kiisisimasut, sulinermut atatillugu tamanna pisimappat, ilaatinneqanngillat. Tamatumani tunngaviussaaq saassussinermut inatsisitigut tunngavissaqarsimanissaq. Politiit qimmiat sulinerup avataani saassussisoq aammalu inunnik imaluunniit uumasunik allanik ajoqusiisumik kiisisoq § 10, imm. 2-imi pineqartunut ilaavoq. Politiit toqutsisitsinissaq isumagissavaat, tamannalu piginnittumut akiligassanngorlugu pissaaq. Qimmeq toqutsinneqarpat uumasunik illersuinermut inatsimmi § 13 kiisalu inatsimmi matumani § 17 malineqassapput, tassani allasimalluni uumasut sapinngisamik sukkanerpaamik anniartitsinnginnerpaamillu toqunneqartassasut.

Aalajangersakkami nutaatut qimminik paatitsisarnissamut inerteqquteqarneq atuutsinneqalerpoq. Kalaallit Nunaanni qimminik paatitsisarnerup annertussusaa ilisimaneqanngilaq aammalu atuutinngilluinnangajattoq ilimagineqarluni. Kisiannili inerteqquteqarneq qimminik paatinneqartartunik nukittuunillu inerteqquteqarnermut, nunani allani atorineqalersimasumut attuumassuteqarpoq, qimminik taamaattunik piginninnissamuinnaanngitsaq, kisiannili aamma taakkuninnga qimminik paatitsinissamut atuinissamut tunngatillugu. Taamaattumik aalajangersagaq siunissami pingaaruteqalersinnaavoq.

Aalajangersakkami pisartut pingasut erseqqissarneqarput, tassani qimminik inuttut suliaqarnissamik pisinnaatitaaneq pineqaatissiinikkut ataavartussamik imaluunniit piffissamut erseqqinnerusumik aalajangerneqartumi atorunnaarsinneqarsinnaalluni. Atorunnaarsitsinermi tamanna ataavartussamik imaluunniit piffissamut erseqqinnerusumik aalajangerneqartumut atuutissanersoq isummerfigineqassaaq. Naliliinermi tassani unioqqutitsineq pisuni qanoq ittuni pisimanersoq pingaartinneqassaaq. Assersuutigalugu piginnittut uumasunut allanut imaluunniit inunnut saassussinissamik siorasaarisimappata, siorasaarineq tamanna piviusunngortinneqarsimanani. Politiit unnerluussinermi oqartussaasutut, annertoqatigiimmik iliuseqarnissamut tunngaviusut naliginnaasut isiginiartussaavaat, tamatumalu atuunnerani aalajangiinerit pisariaqanngitsumit annertunerusut aalajangiunneqartussaannngillat. Oqaatsimi ”inuttut suliaqarnissaq” isumaavoq, inuup qimmit pigisareqqusaanngikkai, kinguaassiorteqqusaanagit, pigeqqusaanagit imaluunniit paareqqusaanagit.

Nr. 2-mut

Qimmit allattorsimaffimmi allasimasut kisimik inerteqquteqarnermi ilaatinneqarput. Qimmit inerteqquteqarnermi pineqartunut ilaasut pigisarinissaat, eqqunneqarnissaat imaluunniit kinguaassiorinnissaat inerteqqutaavoq. Inerteqquteqarnermi aamma qimminik pineqartunik Kalaallit Nunaannut inuussutissarsiutissatut eqqussinissaq ilaatinneqarpoq. Pigisaqarnissamik inerteqquteqarneq aamma isumaqarpoq inuinnaat, takornarissat ilanngullugit, qimminik inerteqqutigineqartunik, assersuutigalugu sulinngiffeqarlutik Kalaallit Nunaanniinnerminni nassarnissaat inerteqqutaasoq.

Inerteqquteqarneq aamma akusanut, qimmit taaneqartut akuusimatillugit atuuppoq. Aammattaaq akusat qimmit inerteqqutaasut ataaseq arlallilluunniit akuusimatillugit, piginissaat, eqqunnissaat imaluunniit kinguaassiorinnissaat inerteqqutaavoq. Akusanik qimmit taaneqartut akuutillugit, pigisaqarnissamik inerteqquteqarneq aamma isumaqarpoq inuinnaat, takornarissat ilanngullugit, qimminik taaneqartunik akusaasunik, assersuutigalugu sulinngiffeqarlutik Kalaallit Nunaanniinnerminni nassarnissaat inerteqqutaasoq.

Inerteqquteqarnermi aamma qimminik pineqartunik akusanik Kalaallit Nunaannut inuussutissarsiutissatut eqquassinisaaq ilaatinneqarpoq.

Qimminik paatinneqartartunik nukittuunillu akusaasut tassaasut paasineqassaaq: minnerpaamik qimminut pineqartunut angajoqqaat, imaluunniit angajoqqaavisa siuliisa arlaat tassaasooq qimmeq paatinneqartartoq aamma nukittoq.

Aamma qimmit ataasiinnarmik angajoqqaamik siuliinit ungasinnerusumik siuaasallit, akusaasutut inerteqquteqarnermi ilaasutut isigineqarsinnaapput. Qimmeq taamaattoq akusaasutut inerteqquteqarnermut ilaasutut isigineqassanersoq, qimmeq pineqartoq qiningasumik pissuseqarnersoq imaluunniit allatut qimminut paatinneqartartunut nukittuunullu aammalu uumasunut imaluunniit inunnut navianaateqarsinnaasunut atuuttartumik pissuseqarnersoq, naliliinermi ilaatinneqarsinnaavoq. Taamatutaaq naliliinermi ilaatinneqarsinnaavoq qimmeq pineqartoq qimminit allanit qanoq ittunit akusaanersoq. Taamaalilluni qimmeq qimminik saamasuugajuttunik ilaqtariinnilu pigineqarsinnaasunik akusaasut inerteqquteqarnermut ilaasutut isigineqarnissaanut, qimminut qimminik qiningasuusinnaasunik namminersorsinnaassuseqarnerusunillu imaluunniit paarsinissamut malersuinissamullu kinguaassioritaasimasunik akusaasunut naleqqiullugit, tunngavissat annertunerusussaasapput, qimmeq tamanna pissutigalugu Inatsisartut inatsisaanni matumani inerteqquteqarnermut pineqartunut ilaasariaqarani.

Taamaattorli oqaatigineqassaaq qimmeq qanoq pissusilersorajuttunngussanersoq kinguaariinni kingornuttakkat kisiisa tunngavigalugit aalajangerneqarsinnaanngitsoq; - tassa imaappoq kinguaajusup qimmitut paatinneqartartutut nukittuutullu pissusilersulernissaanut, siuaasamit tassaasumit qimmeq paatinneqartartoq nukittoorlu, sananeqaatitigut kingornussat qanoq annertutigisut pigineqassanersut apeqqutaatillugit aalajangerneqarsinnaanngitsoq. Tassalu pisuni immikkuullarissuni qimmeq aalajangersimasooq kissaatigineqanngitsumik pissusilersuuteqalerpat, aamma angajoqqaat siuaavisa siuliinut tunngassuteqaraluarpuunniit, politiit akuliussinnaapput.

Nr. 3-mut

Aalajangersakkami § 10, imm. 2-imi qimminik kiisortunik toqutsisitsisarnissamik aalajangersakkat atuuttut ilassuserneqarput. Qimmit kiisalu inerteqqutigineqartutut allattorsimaffimmeersunik akusat § 12, imm. 2-imi unioqutitsilluni pigineqartut, eqqunneqartut imaluunniit kinguaassiorinneqartut, politiit pineqaatissiinerisigut, kiisortuunngikkaluartut aammalu uumasunik piginnittunut taarsiinertaqanngitsumik toqutsinneqassapput. Piginnittuusut toqutsisitsinermi aningaasartuutit akilissavaat. Qimmit toqutsinneqartussanngorpata uumasunik illersuinermut inatsimmi § 13 kiisalu inatsimmi matumani § 17 malinneqassapput, tassani allassimalluni uumasut sapinngisamik sukkanerpaamik aammalu anniartitsinnginnerpaamik toqunneqassasut.

Nalornisoqartillugu politiit piginnittut qimmit suussusaannut imaluunniit suussuseqarnerannut uppernarsaammik piunasaqarfigisinnaavaat. Taamaalilluni qimmimik piginnittoq uppernarsaasussaavoq, qimmeq inerteqquteqarnermi pineqartunut ilaasuunngitsoq.

Taamaattorli politiit piginnittup qimmeq pineqartoq inerteqquteqarnermi pineqartunut ilaanngitsoq uppernarsaammik pisariaqartumik pissarsinissamik piunasaqarfigilinnginnerani, aallaqqaammut – assersuutigalugu qimmip isikkua imaluunniit piginnittumit allanilluunniit paasissutissat tunngavigalugit – qimmeq inerteqquteqarnermi pineqartunut ilaasuusinnaasooq pineqartoq ilimaginissaanut naapertuuttumik tunngavissaqassaaq.

Tassalu politiit erseqqinnerusumik pissutissaqanngippat qimmimik piginnittumit uppersaammik piumasaqarsinnaanngillat, assersuutigalugu qimmeq sutigulluunniit qimmitut inerteqquteqarnermi ilaasutut isikkoqanngippat.

Piginnittoq qimmip suussusaanik uppersaaniarluni uppersaammik qanoq ittumik saqqummiussisinnaassanersoq piumasaqaatinik Inatsisartut inatsisaanni aalajangersaasoqanngilaq.

Qimmimik piginnittoq assersuutigalugu qimmeq pillugu siuaasanik nalunaarsuiffimmik saqqummiussisinnaavoq, imaluunniit piginnittup inunnit qimmip naggiinik nassuiaasinnaasunit, assersuutigalugu qimmiuteqarfinnik piginnittunit, uppersaanernik saqqummiussisinnaavoq.

Ullumikkut DNA-mik misissuisimaneq atorlugu imaluunniit uumasut nakorsaanik ikiorteqarluni qimmit suussusaanik eqqoqqissaartumik aalajangiisinnaaneq ajornarpoq. Taamaattumik qimmimik inerteqquteqarnermi pineqartunut ilaasunut assingusumik qimmertaarnermi, assersuutigalugu siuaasanik allattuiffimmik pissarsinissaq qulakkeerneqartariaqarpoq. Tassunga atatillugu soorunalimi paasisutissat eqqortuunissaat pisariaqarpoq.

Qimmimik isikkuatigut qimminut inerteqqutaasunut assingusunik isikkoqartumik pisisimagaanni, qimmip suussusaanut imaluunniit suussuseqarneranut uppersaammik pissarsinissaq immikkut eqqumaffigineqassasoq inassutigineqarpoq.

Qimmit makkua qimminut inerteqqutaasunut ataatsimut arlalinnuunniit isikkumikkut assigiissuseqarput, taamaattumillu qimminik taamaattunik pigisaqalernermi qimmip suussusaanut uppersaammik pissarsinissamik qularnaarinissaq immikkut eqqumaffigineqartariaqarpoq:

Polski owczarek podhalanski
Cao fila de sao miguel
Dogue de bordeaux
Bullmastiff
Mastiff
Mastino napoletano
Cane corsa italiano
Staffordshire bullterrier
Dogo canario
Anatolsk hyrdehund
Iberisk dogge

Allattorsimaffik tamakkiisuunngilaq.

Politiit nammineerlutik imaluunniit innuttaasunit saaffigineqarnerminni inatsisit malinneqarnissaat qulakkeertussaavaat. Inerteqquteqarnissaq siunnersuutigineqartoq tunngaviusumik piginnittup qimmeq qimminut imaluunniit taakkunanga akusanut inerteqquteqarnermut ilaasunut ilaanersoq pillugu nalornissuteqartoq, qimmimik inerteqquteqarnermi pineqartunut ilaangitsumik qimmeqarluni uppersarsinnaassagaa tunngavigineqarpoq.

Tassani pingaartinneqarpoq inerteqquteqarnermik aaqqissuussineq eqaatsumik malitsinneqassasoq, taamaalilluni qimminik piginnittunik malersuisoqalissanani. Tassunga atatillugu naatsorsuutigineqarpoq, piginnittup qimmip inerteqqutigineqartunut ilaannginneranik uppernarsaasusaatitaanera, politiit assersuutigalugu qimmip isikkua tunngavigalugu imaluunniit qimmeq pillugu paasisutissat tunngavigalugit, naapertuuttumik ilimagisariaqarpat qimmeq inerteqquteqarnermi pineqartunut ilaasoq, aatsaat tamanna pisussanngortussaasoq.

Piginnittoq naammattumik uppernarsaammik saqqummiisinnaasimangippat politiit qimmimik tigusinissaat paarinninnissaallu, Kalaallit Nunaannut eqqartuussisarnermut inatsimmi kap. 37 tunngavigalugu pissaaq.

Politiit aalajangerpata qimmeq tiguneqarallassasoq aammalu isumannaatsumik inissinneqassasoq, assersuutigalugu qimminik paaqutarinnittarfimmi, tamanna piginnittumut akiligassanngorlugu pissaaq. Piffissaq akiliiffiususaaq, piffissamit politiit qimmimut uppernarsaasiisnaanginnermik tunngaveqartumik qimmimik tigusineranit aallartissaaq, piginnittup politiinut naammattumik uppernarsaammik saqqummiussinissaata tungaanut ingerlassalluni.

Aalajangersakkami pisut politiit uppernarsaasiinissamik piunasaqarnerisa nalaanni piginnittup paarinnittullu assigiinngitsuunerat siunnerfigineqarput. Aallaaviatigut piginnittup akisussaaffigaa paarinnittup qimmip suussusaanut imaluunniit suussuseqarneranut uppernarsaammik tigummiaraqarnissaa. Pisoqarsimasinnaavoq piginnittoq paarinnittumut uppernarsaatinik naapertuuttunik tunniussisimanani, aammalu politiit tamaattumik uppernarsaammik saqqummiussinissamut piffissaliussamik aalajangersaanissamut periarfissaqarput. Assersuutigalugu piginnittoq sulinngiffeqarsimasinnaavoq, suliffimminit angalasimasinnaalluni imaluunniit napparsimavimmi katsorsartilluni uninngasimasinnaalluni. Tamanna politiit piffissaliussamik aalajangersaatillutik naliliinerminni ilaatissavaat. Assersuutigalugu paarinnittoq ilisimatitsippat, piginnittoq ulloq aggustip aallaqqaataaniit 15-annut sulinngiffeqartoq, piffissaliussaq aggustip 15-anit siusinnerusumik naasinnaangilaq, tamatumani paarinnittoq nammineerluni uppernarsaammik piunasaqarnerumik pissarsisinnaasimangippat, assersuutigalugu piginnittup angerlarsimaffianut isersinnaalluni imaluunniit piginnittoq sulinngiffeqarnerani attaveqarfignissaallugu.

Aalajangersakkami aalajangersarneqarpoq piginnittoq qimmip suussusaanut uppernarsaammik naammattumik politiit piffissaliussaata iluani saqqummiussinngippat, qimmeq inerteqquteqarnermut unioqquitsisumik inissisimasutut isigineqassaaq aammalu piginnittup akiligassaanik toqutsinneqassalluni, takuuk. § 12 a, imm. 1.

Inuit 1. juli 2011 sioqqullugu qimmeqalersimasut imaluunniit qimminik inerteqquteqarnermi pineqartunut ilaasunik akusanik peqalersimasut, qimmeq piginnarsinnaavaat, piunasaqaatit makkua naammassineqarsimappata:

Qimmeq silami, aqqusinermi, inuit aqqutaanni, uninngaartarfinni il.il. nalinginnaasumik angalaarfiusartuniippat, qimmeq tamatigut annerpaamik 2 meterisut takissuseqartumik aalajangersimasumik pituutaqartinneqarluni ingerlanneqassaaq. Illoqarfimmi nunaqarfimmilu aqqusinermit, inuit aqqutaanni, uninngaartarfinni il.il. asfalterisimanissamik piunasaqaateqaataanngippat aatsaat qimmeq sumiiffinni kikkunnilluunniit orinneqarsinnaasuniittoq pineqarsimassaaq. Qimmip tamatigut annerpaamik 2 meterisut

takissusilimmik pituutaqartinneqarnissaanik piunasaqaat, aamma asimi nunaannarmi atuuppoq, tassalu sumiiffinni illoqarfiup nunaqarfiullu avataanniittuni.

Qimmeq sumiiffinni kikkunnilluunniit orninneqarsinnaasuniitilluni isumannaatsumik matoqqasumillu qania assiaqutaqartinneqassaaq.

Qimmeq tunniunneqassanngilaq, tassalu tunineqaqqusaanngilaq, tunniuteqqusaanani il.il.

Inuit qimminik inerteqquteqarnermi pineqartunut ilaasunik piginnittut sulinnigiffeqarnerminnut assigisaannullu atatillugu qimmeq allanut paaritissinnaavaat, taamatullu allanut qimmeq aneerutsinneqarsinnaavoq. Taamaatoqartillugulu piffissaq killilerneqarsimasoq pineqassaaq.

Qimmit sivisuumik allaniitinneqassanngillat, allaat tunniussivinnertut isigineqarsinnaalissanani. Assersuutigalugu nunani allaniinneq sulinnigiffeqarnerup saniatigut siviunerusussa, aallaaviatigut tunniussivinnertut isigineqassaaq, tamannalu § 12 b-imik unioqquitsinerussaaq. Suliani aalajangersimasuni ataasiakkaani politiit naliliisassapput tunniussineq imaluunniit tunniussinnginneq pineqarnersoq.

Qimmeq allanit paarineqarpat taamatuttaaq piunasaqaatit inatsimmi taaneqartut malinneqassapput.

Inerteqquteqarnermik imaluunniit qanermik assiaqusiinissamik, pituutaqartitsinissamik il.il. piunasaqaammut ikaarsarnermi aaqquissuussinermik saneqqutsinissamik periarfissamik inatsit imaqaanngilaq. Taamaalilluni politiit imaluunniit Justitsministerie qimminik inerteqqutaasunik ikaarsarnermi aaqquissuussami ilaatinneqaanngitsunik paarinninnissamut imaluunniit qimmit ikaarsarnermut aaqquissuussami ilaatinneqartut pituutalernagit aamma qarngi assiaqutsernagit aneerunnissaannut imaluunniit tunniusinissamik akuersissummik tunniussisinnaanngillat.

Nr. 4-mut

Aalajangersakkami aalajangersarneqarpoq aalajangersakkat taaneqartut unioqquatinneqarpara, pineqartoq akileeqqusissummik pineqaatissinneqarsinnaasoq. Unioqquitsinermi naatsorsuutigineqarpoq siullermeertumik pisoqarnerani akileeqqusissutip annertussusaa 1.500 koruuniussasoq. Aappassaanneertumik pingajussaanneertumillu pisoqarnerani naatsorsuutigineqarpoq akileeqqusissutip annertussusaa 2.000 koruuniussasoq aamma 3.000 koruuniussasoq. Taamaattorli § 10, imm. 3-imik unioqquitsinermi akileeqqusissutip annertussusaa 10.000 koruuniussasoq. Akileeqqusissutit annertussusaa naatsorsuutigineqartut ilitersuutaapput aammalu eqqartuussivinni annertunerusunngorlugit annikinnerusunngorlugilluunniit aalajangerneqarsinnaallutik.

Nr. 5-mut

Aalajangersakkami aalajangersarneqarpoq aalajangersakkanik taaneqartunik sakkortuumik uteqattaartumillu unioqquitsinerni, sunilluunniit uumasuteqarnissamik inerteqquteqarluni pineqaatissiiisoqarsinnaasoq. Naliliinermi pingaartinneqassaaq pineqartoq siusinnerusukkut uumasunik suliaqarsinnaatitaanermik arsaarneqarsimanersoq, unioqquitsineq tuniseqqinnissamik iluanaaruteqarnissamillu siunertaqarsimanersoq, pineqartup qimmit ulorianartuunerannik aqutsisinnaassuseqarnersoq, pineqartoq qimmiuteqarnermini avatangiisiminut ersiortitsinersoq, kiisalu pineqartoq siusinnerusukkut qimminik toqutsisitsisimanersoq, aammalu tamatuma peqqinnissaa tunngavilersukkamik ilimagineqarsinnaanersoq. Allattuiffik tamakkiisuunngilaq, aammalu suliami pisut ilisarnaatillu immikkut ittut eqqarsaatigineqassapput.

Nr. 6-mut

Aalajangersakkami qularnaarneqassaaq akileeqqusissutit inatsimmi matumani tunngaveqartumik pineqaatissiissutaasut Nunap karsianut tutsinneqartarnissaat.

§ 2- imut

Siunnersuutigineqarpoq Inatsisartut inatsisaat ulloq 1. juli 2011 atuutilissasoq.

§ 12, imm. 2-imi inerteqquteqarnermi qimmit Inatsisartut inatsisaata atuutilernerata kingorna erniarineqartut kisimik ilaatinneqarput.